

Oleh : DATO' SRI MOHD NAJIB TUN ABD RAZAK
Tempat : PARLIMEN
Tarikh : 24-10-2005
Tajuk : USUL MERAKAMKAN PERASAAN DUKACITA DI ATAS
KEMBALINYA KE RAHMATULLAH ALLAHYARHAM YABHG DATIN
SERI ENDON MAHMOOD DAN UCAPAN TAKZIAH KEPADA
KELUARGANYA

Tuan Yang di-Pertua,

Saya dengan perasaan yang amat sedih memohon izin di bawah peraturan 27 (3) Peraturan-peraturan Majlis Mesyuarat Dewan Rakyat untuk mengemukakan di Dewan yang mulia ini suatu usul seperti berikut:

“Bahawa Dewan ini merakamkan perasaan dukacita dan belasungkawa yang amat sangat di atas kembalinya ke Rahmatullah Allahyarham YABhg Datin Seri Endon Mahmood, isteri YAB Perdana Menteri pada 20 Oktober 2005 dan menyampaikan ucapan takziah kepada seluruh ahli keluarganya”.

Tuan Yang di-Pertua,

Allahyarham YABhg. Datin Seri Endon Mahmood telah kembali ke pangkuan Ilahi pada hari Khamis, 20 hb Oktober 2005 bersamaan 16 hb Ramadhan 1426 hijrah tepat jam 7.55 pagi setelah dengan penuh sabar, cecal dan tabahnya melawan penyakit kanser yang dihidapinya sejak tahun 2002.

Allahyarham YABhg. Datin Seri Endon Mahmood dilahirkan tanggal 24 hb Disember tahun 1940. Ayahanda beliau bernama Dato Mahmood Ambak dan bondanya ialah Datin Mariam Abdullah. Beliau merupakan anak kembar dalam keluarga. Allahyarham menerima pendidikan awal di Sekolah Kebangsaan Methodist, Kampar, Perak dan meneruskan pendidikan beliau di Sekolah Menengah St. Mary, Kuala Lumpur. Beliau telah mendirikan rumahtangga dengan YAB Perdana Menteri pada 4 hb September tahun 1965 dan dikurniakan dengan sepasang cahayamata lelaki dan perempuan. Allahyarham pernah berkhidmat dengan jabatan kerajaan dan telah memilih untuk bersara secara pilihan semasa bertugas di Jabatan Perkhidmatan Awam pada tahun 1976.

Tuan Yang di-Pertua,

Secara peribadinya saya dan isteri telah lama menghormati dan menganggap Allahyarham sebagai seorang kakak malah beliau begitu mesra dengan panggilan 'Kak Endon'. Saya pasti ramai lagi yang turut berkongsi rasa keakraban yang murni ini. Kerana itulah juga saya yakin bahawa kita semua memperakui bahawa Allahyarhamlah sebenarnya 'Penyokong Nombor Satu' kepada YAB Perdana Menteri kita yang dikasihi, Dato' Seri Abdullah Hj Ahmad Badawi. Jelasnya, Allahyarham adalah seorang isteri, ibu, sahabat serta Wanita Pertama yang amat penyayang lagi prihatin. Pepatah ada menyebut bahawa kejayaan seorang suami tentunya atas dokongan seorang wanita yang bergelar isteri. Justeru, secara khususnya, kepulangan Allahyarham ke Rahmatullah merupakan satu kehilangan yang amat sangat dirasakan terutamanya kepada YAB Perdana Menteri kerana selaku isteri, sudah pasti Allahyarham memainkan peranan penting sebagai tulang belakang kepada suami tercinta. Bahkan, YAB Perdana Menteri dan Allahyarham Datin Seri Endon Mahmood telah disifatkan oleh ramai sebagai pasangan bahagia seperti isi dengan

kuku, amat rapat dan jarang berpisah.

Sesungguhnya, satu perkara yang paling dikenang oleh rakyat Malaysia tentang Allahyarham adalah sumbangannya dalam menggalakkan kesedaran terhadap kanser di negara ini. Beliau merupakan sumber inspirasi kepada pesakit-pesakit kanser yang lain dengan semangat juang yang tinggi dan berani untuk menentang penyakit tersebut. Dalam hal ini, saya berasa sungguh sebak apabila mengingatkan yang Allahyarham pernah berkata bahawa pesakit kanser boleh diibaratkan sebagai 'pemenang' kerana kekuatan, ketabahan dan semangat jitu mereka berjuang melawan penyakit ini. Tampaknya, Allahyarham telah betul-betul membuktikan kata-kata beliau itu dan benar-benar menjadi seorang 'pemenang' dengan berjuang bersungguh-sungguh melawan penyakit kansernya. Namun, takdir serta ketetapan Allah S.W.T. tidak dapat dielak lagi dan ia mengatasi segalanya.

Tuan Yang di-Pertua,

Sebagai isteri kepada YAB Perdana Menteri, Allahyarham juga telah memikul amanah sebagai Yang di-Pertua Badan Amal dan Kebajikan Isteri-Isteri Menteri dan Timbalan-Timbalan Menteri atau ringkasnya BAKTI. Allahyarham telah memimpin BAKTI dengan penuh wibawa dan cemerlang dalam menjayakan pelbagai program dan aktiviti. Antaranya, sikap prihatinnya telah membolehkan orang kurang upaya (OKU) mendapat perhatian serta kemudahan. Melalui Program Semai Bakti Pusat Pemulihan Dalam Komuniti (PDK), perhatian akan diberikan kepada golongan OKU dan masyarakat FELDA di seluruh negara. PDK ini telah Allahyarham sempurnakan penubuhannya pada 22 Ogos 2004 di Felda Gedangsa, Hulu Selangor. Hasrat murni Allahyarham agar PDK dapat membuka peluang kepada anak kurang upaya yang tidak boleh mengikuti pendidikan di sekolah biasa atau institusi khas tetap mendapat penajaan pendidikan yang sempurna.

Apa yang lebih mengkagumkan ahli-ahli BAKTI dan kita semua ialah sikap penuh tanggungjawab dan sangat mengambil berat beliau berkaitan aktiviti-aktiviti BAKTI sehinggalah keadaan kesihatan beliau tidak mengizinkannya lagi. Untuk makluman semua juga, biarpun semasa berada dalam rawatan di luar negara Allahyarham tetap mengambil tahu tentang perkembangan aktiviti BAKTI dan juga projek-projek amal yang dinaunginya dengan begitu bersungguh-sungguh.

Hakikatnya lagi, pemergian Allahyarham YABhg. Datin Seri Endon Mahmood ke Rahmatullah disifatkan sebagai satu kehilangan besar kepada industri dan karyawan batik serta songket yang kini menjadi satu sejarah dan warisan negara. Sebenarnya Allahyarham adalah tokoh yang bertanggungjawab mengembalikan semula kesegaran industri batik dan songket di dalam serta di luar negara. Batik Malaysia kini telah dikenali di persada antarabangsa. Semua ini di atas kegigihan serta usaha Allahyarham mempromosikannya melalui kempen dan pelancaran di bawah program Batik Malaysia-Melakar Dunia.

Usaha beliau telah berjaya meningkatkan rezeki pengusaha-pengusaha batik terutamanya peniaga batik kecil-kecilan. Selain itu, minat serta kecintaannya terhadap kebaya nyonya juga membolehkan beliau menjalankan kajian mengenainya selama 20 tahun secara diam-diam. Hasilnya, buku-buku mengenai kebaya nyonya tulisan Allahyarham telah berjaya dilancarkan untuk tatapan umum sebagai identiti warisan yang bernilai. Usaha murni ini telah melayakkan Allahyarham terpilih sebagai Tokoh Jarum Berlian Malaysia sempena Minggu Fesyen Kuala Lumpur (MFKL 2004) anjuran Kumpulan Utusan.

Sememangnya ialah peranan yang dimainkan oleh Allahyarham dalam menobatkan batik, songket serta kebaya nyonya sekali gus industri fesyen negara amat besar dan akan kekal dalam lipatan sejarah tanah air. Jadi, tentu sekali pemergian mengejut Allahyarham merupakan sesuatu yang sukar diterima oleh mereka yang berkecimpung di dalam industri ini. Kata orang, "hilang sudah rimbun berteduh, patah sudah ranting berpaut".

Tuan Yang di-Pertua,

Seterusnya lagi, melalui Yayasan Budi Penyayang, Allahyarham telah menabur budi dan bakti dengan melaksanakan begitu banyak kerja-kerja amal. Yayasan yang diasaskan oleh Allahyarham ini diharapkan dapat menjadi badan yang terbaik bagi menghimpunkan khazanah kebajikan serta jasa beliau kepada masyarakat semasa hayatnya.

Sebagai mengenang jasa-jasa beliau yang terpuji kepada negara, Allahyarham YABhg. Datin Seri Endon Mahmood telah dianugerahkan dengan berbagai-bagai bintang dan darjah kebesaran daripada Kerajaan.

Di samping itu Allahyarham juga telah dianugerahkan Pingat Emas Tun Fatimah pada Ogos 2004 oleh Majlis Kebangsaan Pertubuhan–Pertubuhan Wanita Malaysia (NCWO) bagi menghargai ketabahannya menghadapi cabaran sebagai pesakit kanser.

Tuan Yang di-Pertua,

Allahyarham YABhg. Datin Seri Endon Mahmood akan sentiasa diingati sebagai seorang wanita yang murah hati, merendah diri dan amat penyayang orangnya. Perwatakannya lemah lembut dan hemahnya yang penuh dengan naluri keibuan tentu menambat hati sesiapa sahaja yang pernah mengenalinya.

Allahyarham yang juga telah dimasyhurkan sebagai Canselor Pertama Universiti Terbuka Malaysia pada 16 Disember 2004 menjadi satu kehilangan yang amat dirasai oleh bukan sahaja ahli keluarga, sahabat handai, rakan taulan malah bagi setiap seorang daripada warga universiti tersebut.

Kendatipun begitu, pemergian wanita berhati mulia dan bersemangat waja ini meninggalkan sebuah nama terbilang yang terpahat indah disanubari kita semua selamanya. Jelasnya lagi, komitmen Allahyarham terhadap masyarakat sebagai isteri pemimpin nombor satu negara telah dipenuhi. Peranan Allahyarham sebagai wanita, isteri dan ibu juga sudah ditunaikan dengan sempurnanya.

Kini, wanita pertama yang kita sanjungi telah tiada lagi. Yang tinggal hanya jasa dan kata-kata dorongannya sebagai kenangan. Nan dititik nan dieja, nan ditilik nan ditimang, nan semua jasamu Kak Endon takkan kami lupa, walau sebaris pun tak mungkin akan hilang.

Nyatanya, Allahyarham yang kita kasihi ini telah kembali kepada Penciptanya. Kembali untuk memenuhi janjinya kepada Allah Yang Maha Esa. Daripada-Nya kita datang, kepada-Nya juga kita kembali.

Tuan Yang di-Pertua,

Sekali lagi bagi pihak Kerajaan, saya dan semua Ahli-ahli Dewan Rakyat ini serta rakyat jelata berasa amat terharu di atas kembalinya ke Rahmatullah Allahyarham YABhg. Datin Seri Endon Mahmood. Oleh yang demikian, bagi pihak Kerajaan dan Ahli-ahli Dewan Rakyat ini juga, saya dengan tulus ikhlasnya menyampaikan ucapan takziah kepada YAB Perdana Menteri serta seluruh kaum keluarganya. Khususnya kepada YAB Perdana Menteri, kita mendoakan agar beliau terus tabah menghadapi dugaan besar ini. Saya dan rakan-rakan yang lain serta seluruh rakyat Malaysia akan tetap memberi sokongan padu dan tidak berbelah bahagi agar YAB Perdana Menteri terus beriltizam memimpin kita semua dengan penuh Cemerlang, Gemilang dan Terbilang. Semoga Allah Subhanahu-Wa-Taala mencucuri Rahmat ke atas roh Allahyarham YABhg. Datin Seri Endon Mahmood. Saya menjemput semua ahli dewan bertafakur sejenak dan kepada yang beragama Islam kita sedekahkan Al – Fatihah.

Tuan Yang di-Pertua, saya memohon mencadangkan.